



«Tocker simplamaing nöglia dadour il nair!» – quai es la devisa da success dal tregant da pistola Elmar Fallet da Müstair.

FOTOS DARIO MÜLLER

FESTA FEDERALA DA TIR

Ingün tun dadour il nair

La Festa federala da tir a Cuaira e contuorns es in plain’acziun. Per millis e millis da tregantas e tregants ha quista festa la medem-ma gronda valur sco pels luottaders la Festa federala da luotta. Eir pro la Festa federala da tir daja nempe in tschertas disciplinas raïnas e rais. Ün tal titel manca amo ad ün dals meglfers tregants da pistola in tuot il Grischun, Elmar Fallet da Müstair. Cuort avant cha sias concurrenzas da qualificaziun han lö, ha la FMR visità al tregant da pistola paschiunà.

DARIO MÜLLER/FMR

VALLADER

Quiet e focussà tira il tregant da pistola Elmar Fallet da Müstair tun per tun seis program da la saira. Id es il «Matchcup», ün tir chantunal sün 50 meters ingio chi’s tira üna jada al mais e chi düra tuot la stà cun ün final dals meglfers tregants grischuns in settember a St. Antönien. Tuottafar cuntaint culla saira nu para Elmar Fallet dad esser.

«Sch’eu guard uossa il resultat nun esa uschè mal, ma las serias sveltas nu sun idas uschè bain», analisescha Elmar Fallet ils «acceptabels» 570 puncts ch’el ha trat quist mais, congualond culs «excellents» 580 puncts da l’ultima jada ed agiundscha riond cha forsà haja quai da chefar cul squitsch da la visita da la FMR.

Adüna trar per guadagnar

Savair ir intuorn cun squitsch, pel paur da 55 ons insè ingün problem. Elmar Fallet vala nempe sco ün dals meglfers tregants da pistola in tuot il Grischun. Ed eir sur ils cunfins grischuns oura as saja fich bain chi ch’el es. Ch’el nu giaja a concurrenzas però nimia simplamaing be per trar, dimpersè adüna per tillas guadagnar, accentuescha il tregant da pistola paschiunà. Ed uschea ha Elmar Fallet pudü ramassar fingià blers titels e bleras medaglias dūrant sia carriera.

Sco per exaimpel üna vainchina da titels sco champiun grischun, la victoria culla gruppa da match grischun a la Festa federala da tir i’l Vallais dal 2015, il titel sco champiun svizzer dal 2017 a Thun e be pel nair da l’ungla nun haja bastü pel titel dal rai a la Festa federala da tir a Lucerna dal 2021. Implü ha il tregant da Müstair survgni fingià quatter jadas la distincziun sco tregant grischun da l’on.

«Ils Fallets sun forsà ün zich sco ils Tomaschetts illa Surselva. Eu n’ha schon survgni quist dun in chüna», manaja Elmar Fallet, guardond inavo grat sün üna carriera chi ha cumanzà insè magari tard.

L’art da far adüna il listess

Fingià adüna fascinà dal trar cul schluppet, ha Elmar Fallet pür dal 2009 chattà la via pro’l sport da trar culla pistola. Però uschè tard sco cha sia carriera sco tregant da pistola ha cumanzà, uschè svelt es gnü il success. Be gūsta



Il trar culla pistola es per Elmar Fallet daspö 17 ons üna da sias plü grondas paschiuns. Dūrant ils ultims ons es el adüna stat ün dals meglfers tregants da pistola in Grischun.

FOTO DARIO MÜLLER

trais ons davo ch’el vaiva cumanzà a trar culla pistola, ha Elmar Fallet pudü guadagnar il tir chantunal a Tusan.

«La carriera es statta, pel trenamaint ch’eu fetsch, bod na da crajer», resümescha il paur da vachas svesa eir adüna darcheu ün zich stupefat da quists ultims ons. «Il trar sülla schaubgia es per mai pudair invlidar ils problems dal minchadi. Tü stoust invlidar tuot ils problems per pudair far ün bun resultat. E quai es il bel.»

E per cha quai funcziuna lura eir adüna uschè sco giavüschà, douvra tenor Elmar Fallet ouravant tuot üna buna fitness, ün man quiet, üna buna controlla da flà e buna coordinaziun tanter tscharvè e daint. E cha lura nu saja il sajettar «insomma ingün’art – l’art es da far adüna il listess», quai chi ha nom per Elmar Fallet: «Tocker simplamaing nöglia dadour il nair!»

Tun per tun – tir per tir

E tenor quist princip tira il tregant da pistola Elmar Fallet fingià daspö var 17 ons tun per tun – dūrant indombrablas sairas, saja quai i’l stand da tira Müstair obain lura in tuot ils oters

stands da tir, dalöntschi e dastrusch, dūrant concurrenzas regiunalas, chantunalas o sco uossa apunta concurrenzas federalas.

La festa da tir federala chi ha lö quists dis a Cuaira e contuorns es ün dals puncts culminants per mincha treganta e mincha tregant, uschea eir per Elmar Fallet. Quai chi vala pels luottaders la Festa federala da luotta, vala pellas tregantas ed ils tregants la Festa federala da tir. Eir quia as poja nempe dvantar in tschertas disciplinas raïna e rai – üna da las distincziun las plü onuraivlas chi manca amo illa vaidrina da medaglias dal tregant da Müstair.

Cha nervus nu saja el amo, manaja Elmar Fallet tuot calm. Cha’l prüm üna jada saja il böt da far ün bun resultat pro las concurrenzas da qualificaziun chi han lö in pacs dis e cha lura cumanzarà, in vista a las rondas finalas in lügl, eir pro el a batter il cour planet ün zich plü svelt. Però, cha tuot saja a la fin finala eir quista vouta avert, conclüda il tregant da pistola paschiunà la saira maniond per finir: «Vairamaing esa simpel. Tü stoust simplamaing esser l’ultim il meglfer.»

SAN MUREZZAN

Seguond scrutin – nouva schelta

A San Murezzan as schlargia la schelta da candidaturas per il presi-di cumünel. Nouv as metta a disposiziun eir Leandro A. Testa per la successiun da Christian Jott Jenny. Uschè do que concurrenza pels candidats Adriano Iseppi, Sebastian Bahner e la candidata Isabel Wenger. Tuots trais nun haun rajiunt la magiurited assoluta da 703 vuschs chi füss steda necessaria per guadagnar la perioda d’uffizi da 2027–2030 in dumengia passada. Uscheja do que ün seguond scrutin pel timun da la vschinauncha ils 19 lügl 2026. E quel permetta eir novas candidaturas scu quella da Leandro A. Testa. (pl/rtr/fmr)



Il quart candidat pel timun da San Murezzan es Leandro A. Testa.

FOTO MAD

BRAIL/CINUOS-CHEL



Quatter musicants sun gnies tschernieus scu commembers d’onur.

FOTOGRAFIA NICOLO BASS

La «Societed da musica da las aclas» ho festagio

La Societed da musica da Cinuos-chel e Brail unescha musicantas e musicants da tuottas duos parts da l’Engiadina – e que già daspö 150 ans. Quist giubileum ho la musica festagio a S-chanf cun la partecipaziun da differentas societeds da musica engiadinaisas.

NICOLO BASS/PL

PUTER

In sanda passada ho la Societed da musica Cinuos-chel/Brail festagio sieu 150level anniversari in üna halla da la FLAB a S-chanf. Differentas societeds da musica da l’Engiadina sun seguidas a l’invid ed haun fat referenza musicala a la giubilera. Per exaimpel las musicas da Silvaplauna, Zernez, Samedan, S-chanf, Susch e la Musica da giuvenils La Plaiv-Zernez.

Duos vschinaunchas – üna musica

Ma a nu d’eira be dad udir musica da tola, dimpersè eir tuns pü sonors dal Cor dal Parc Naziunel e dal Jodlerchörli da l’Engiadin’Ota. Buns giavüschs haun purto il president da l’Uniun da musica chantunela Andy Kollegger ed ils duos presidents cumünels Gian Andrea Bott da S-chanf e Domenic Toutsch da Zernez. Tuots duos haun il dret vi da la mited da la musica: La Societed da musica Cinuos-chel/Brail es nempe l’unica musica in Engiadina chi collia duos vschinaunchas politicas. Cinuos-chel es nempe üna fracziun da S-chanf e Brail üna fracziun da Zernez. Fingià aunz 150 ans d’eira la musica gnida fundada scu «Societed da musica da las aclas».

La Punt Ota per commembers d’onur

Ma la Musica da Cinuos-chel/Brail collia eir l’Engiadina Bassa cun l’Engiadin’Ota e forsà dafatta eir ün pö il vallader cul puter. In mincha cas cha la Punt Ota traunter Cinuos-chel e Brail es il meglfer simbol per quista colliaziun. Quista punt es eir steda preschainta sül regal per quatter musicants chi haun furmo la Societed da musica Cinuos-chel/Brail dūraunt decennis ed haun vivieu la cumpagnia. Cun grand applaus sun els gnies tschernieus scu commembers d’onur da la societad: Nuot Godly es daspö 53 ans musicant e commember da la societad, Reto Juon e Hans Graf daspö 52 ans e Gian Peider Albin daspö 37 ans. Trais dad els haun festagio già il giubileum da 100 ans Societed da musica Cinuos-chel/Brail dal 1976 i’l ravuogl da la musica.

In seguit als discuors haun las 22 musicantas e musicants muso musicalmaing cha lur societad es tuot oter cu veglia e cun duos giuvnas dirigentas suppleantas es eir l’avegnir da la musica garanti. Per trategnimaint fin aint per la not haun a la fin pissero ils musicants da Sargans e la furmaziun Bergland Power.